

曾文正公奏稿

曾文正公奏稿

卷之二十九目錄

會議長江水師營制事宜摺

同治四年十二月二十八日

賊萃湖北派大軍援鄂摺

全日

查覆山東撫藩等參款摺

全日

酌撥馬隊馳赴奉天剿賊摺

同治五年正月十四日

近日軍情并將湖團分別撤畱片

請令劉秉璋襄辦軍務片

查辦湖團酌籌善後事宜摺

二月初八日

報啓行赴周家口日期片

二月十五日

鄧軍援鄂克黃陂縣城摺

三月初五日

鮑超軍北來勦捻籌定餉項摺

全日

近日軍情暫駐濟甯就近調度摺

會議長江水師營制事宜摺

同治四年十二月二十八日

奏爲會議長江水師營制事宜恭摺仰祈

聖鑒事竊臣國藩於同治元年二月覆奏安徽省城仍建安慶案內請專設長江水師提督及總兵以下各官奉

旨交軍機大臣會同該部議奏旋經吏部等於五月二十三日定議具奏准其設立長江水師而於總兵副參以至千把應設幾缺暨分汛修艦各事宜令臣體察情形再行詳核議奏二年四月奉

旨以淮揚鎮總兵黃翼升補授長江提督之缺六月克復金陵濱江五省戰事大定卽應將前募之水勇改爲經制之水兵核

定章程會議具奏特以勇丁之口糧較多額兵之口糧極少相  
去懸絕難於酌中定議展轉籌思是以復奏稍遲臣國藩於咸  
豐二年臘月初招湘勇維時長沙甫經解圍各路兵勇往來湖  
南絡繹不絕臣徧查餉章參差不齊惟張國樑之勇每月五兩  
四錢江忠源之勇每月四兩五錢該兩軍最爲有名於時逮三  
年夏開勝保奏請招募陸勇月餉四兩五錢戶部議准江南大  
營循而行之遂定爲報銷之常例臣於三年冬開召募水陸兩  
軍陸勇酌減爲每月四兩二錢而親兵什長稍有增加水勇酌  
減爲每月三兩六錢而礮手舵工稍有增加厥後銀價日賤米  
價日昂咸豐十一年楊載福等請將水勇加爲每月三兩九錢

至今未改臣復詳加詢訪除山東河南餉章微少外其餘江楚  
閩浙等十餘省勇餉均係四兩有奇目下各路招集陸勇紛紛  
未已若水軍驟爲大減則人皆去爲陸勇誰復願充水兵故臣  
所議章程於兵餉條暫從其優俟軍務告竣再行酌量核減審  
時度勢有不能不出於此者非敢與陸營戰守糧額故示懸殊  
也自古養兵本無善政南宋之括財晚明之增餉皆爲兵多所  
累識者病之我

朝綠營兵丁五十餘萬較之宋明已屬極少然乾隆四十六年  
議增缺額名糧大學士阿桂會上疏力爭臣國藩亦於咸豐元  
年疏請裁兵五萬戶部初未議准後乃通行各省酌辦溯自洪

楊倡亂捻回繼變軍興十餘年惟向榮和春大營用兵稍多其餘皆倚勇丁以集事

國家養兵之費歲逾二千萬當此多事之秋乃未聞綠營立一奇功出一良將今各省勇丁合計約在五十萬以外而昔年經制之兵仍未能議裁議減守戰各兵在營之坐糧雖少而出征外省加以鹽折夫價餘丁等款每兵一名月支亦在五兩上下平日有糧少之名臨事無省費之實百年受養兵之累應急無破寇之效統籌全局殊非長策臣愚以爲軍務全竣後仍當綜核名實裁減陸兵其必不可裁者卽當增加口糧此又因今日設立水營而卽爲異日綠營之地者也謹議事宜三十條營制

二十四條分繕二摺恭呈

御覽計戰船七百七十四號除提督已頒關防外新設總兵四員撥出兼隸之總兵一員副參游三項營官二十四員都守千把外委等哨官七百七十四員兵數一萬二千餘人兵餉船價廉俸雜費修艦之資約計每月五萬有餘凡選將練兵餉項捕務暨考核教演之法莫不嚴定章程冀垂令典請

旨勅下軍機大臣會同吏戶兵工等部暨總理衙門核議施行所有會議長江水師營制事宜緣由謹會同漕運總督臣吳棠

護江蘇巡撫臣劉郁膏安徽巡撫臣喬松年江西巡撫臣劉坤

一湖北巡撫臣鄭敦謹湖南巡撫臣李瀚章恭摺由驛具奏伏

乞

皇太后

皇上聖鑒訓示再此摺係臣曾國藩彭玉麟主稿合併聲明謹奏

長江水師事宜

第一條提督建衙太平府

長江水師提督駐紮原議在於蕪湖建立衙署查蕪湖內河甚小冬令水涸不能安泊戰艦若泊大江之中則洪濤巨浸其患莫測查江南太平府河外通江內通湖可紮戰船數十營右達皖南甯國府南漪固城諸湖左達江蘇高瀆溧水兩縣石臼丹陽諸湖兼可扼東壩之要隘擬以提督駐紮太平府設立衙署

第二條提督立行署於岳州

長江水師提督管轄之地上自荊州岳州下自江蘇崇明兩岸支河內湖均歸統轄計程近五千餘里分列五省若僅駐紮太

平府恐其照料難周擬於岳州府設立行署該提督分月輪駐以半年駐下江太平府以半年駐上江岳州府每年周歷巡查駐上江則巡閱至洞庭湖荊州止駐下江則巡閱至狼山止

### 第三條提督單銜奏事

長江水師提督統轄較遠責任甚重擬請單銜奏事以專責成如遇有與各省地方公事及陸營交涉之件則會商該省督撫分別奏咨辦理如地方公事及陸營有與水師交涉之件該省督撫亦會商長江提督分別奏咨辦理提督之官其初本係文職明末李如松始以武臣而爲提督初尙文武兼用後乃專用武職惟九門提督一缺尙是文武兼領江皖晉豫等省提督之

缺尙以巡撫兼領略存舊制今長江提督一缺擬請文武兼用蓋緣長江通商處處與外國交接朝夕相見必須提督平日稍有威權乃足以資彈壓該提督仍歸兩江總督湖廣總督節制

第四條長江共立六標

長江水師共立六標提督駐紮太平府所轄提標五營岳州設一總兵所轄鎮標四營漢陽設一總兵所轄鎮標四營湖口設一總兵所轄鎮標五營瓜洲設一總兵所轄鎮標四營狼山鎮總兵兼隸長江所轄鎮標二營通共二十四營

第五條長江與各省水面分界

長江水師與各省河湖交界之處應卽畫分界限各有汛地以

專責成湖北除江面千餘里全歸長江提督外其自荊州以上  
沂江至宜昌巴東漢陽以上沂漢至襄陽鄖陽及各支河湖汊  
應由湖北另行設防歸湖廣總督湖北提督統轄湖南除江面  
及洞庭湖歸長江提督外其湘沅二水應由湖南另行設防歸  
湖南巡撫湖南提督統轄江西除江面及鄱陽湖歸長江提督  
外其吳城以上省河及東西支河應由江西另行設防歸江西  
巡撫統轄安徽除江面與傍江之湖歸長江提督外其淮河自  
正陽關以下至洪澤湖止并接連蘇屬之支河湖蕩應另設淮  
揚水師歸淮揚鎮總兵統帶兩江總督漕運總督安徽巡撫兼  
轄江蘇除江面歸長江提督外其自鎮江以東凡江南之支河

湖蕩慮另設大湖水師歸兩江總督江蘇巡撫江南提督統轄其舊設海口之狼山福山蘇松三鎮除福山蘇松二鎮悉仍其舊外擬以狼山鎮兼隸長江提督標下仍聽兩江總督江南提督節制

第六條副參游沿江建衙

副將參將游擊各有專營自應設立衙署惟長江水師營汛其責任專重在水面并無防守城池彈壓市鎮之責其立汛建署須擇有港汊內河可收泊戰艦者庶免風濤覆溺之患雖孤洲野岸亦可修造衙署宜距城市稍遠乃爲妥善

第七條都司以下不立衙署

水師官兵皆宜以船爲家不准登岸居住如違例住岸上者官  
卽革職兵卽革糧自都司以下皆係哨官卽以哨船爲辦公之  
所不准建衙陸居至長江提鎮除例給坐船外各給督陣舢板  
二號每船額設守備哨官一員兵二十名內舵兵一名頭兵一  
名礮兵二名槳兵十六名凡提鎮衙門巡捕跟丁執事人等輪  
流派此船之人值班聽差下班仍以船爲家不准在岸居住副  
參游督陣舢板各一號悉如之

第八條營制船數

副將營制戰船四十三號內長龍船二號舢板船四十號督陣  
大舢板船一號參將營制戰船三十三號內長龍船二號舢板

船三十號督陣大舢板船一號游擊營制戰船二十三號內長  
龍船二號舢板船二十號督陣大舢板船一號其雖係游擊營  
制而用船三十三號者惟岳州漢陽二營凡專立之營皆以都  
司二員管駕長龍爲領哨其各散哨員弁均受約束左領哨專  
管本營錢糧右領哨專管本營船礮軍裝及一切差遣巡查諸  
務其舢板之以守備充哨官者爲副領哨每守備率領船十號

第九條戰船人數

長江水師額兵副將營督陣舢板船一號兵二十名長龍船二  
號每船二十五人共兵五十名舢板船四十號每船十四人共  
兵五百六十名稿書書識十四名共額兵六百三十名共哨官

四十三員參將營督陣舢板船一號兵二十名長龍船二號每  
船二十五人共兵五十名舢板船三十號每船十四人共兵四  
百二十名共額兵四百九十名共哨官三十三員游擊營督陣  
舢板船一號兵二十名長龍船二號每船二十五人共兵五十  
名舢板船二十號每船十四人共兵二百八十名共額兵三百  
五十名共哨官二十三員其游擊營亦有用三十三船者全仿  
參將營之例稿書識均不在內

第十條都司於本船之外另有打仗舢板

領哨都司除長龍戰船一號有兵外另給無兵之舢板船一號  
如遇出兵入小河港汊恐長龍遲滯則由長龍撥兵歸此舢板

乘坐領哨出隊以期便捷

第十一條設立書吏

長江水師提督用稿書四名書識八名總兵用稿書二名書識六名副參游皆用稿書二名書識四名都司用稿書一名書識二名守備用書識二名千把各用書識一名

第十二條兵丁糧額

咸豐四年初立水師之時較陸軍勇糧稍減漿手每月三兩六錢舵工四兩五錢頭工四兩二錢不等厥後因銀價日賤米價日貴漿手加爲三兩九錢今將水勇改爲額兵而各處陸營紛紛招募若遽將水兵口糧太減則人皆去爲陸勇誰復肯當水

兵自應酌量暫從其優長龍戰船額設兵二十五名內舵工兵  
一名每月給銀三兩六錢每日一錢二分管艙兵一名頭工兵  
一名礮手兵四名每月給銀三兩每日一錢漿手兵十八名每  
月給銀二兩七錢每日九分舢板戰船額設兵十四名內舵工  
兵一名頭工兵一名礮手兵二名漿手兵十名督陣大舢板額  
設兵二十名內舵工兵一名頭工兵一名礮手兵二名漿手兵  
十六名月餉均與長龍戰船同稿書與舵糧同月支三兩六錢  
書識與漿糧同月支二兩七錢俟軍務大定各路并無招勇之  
事再由長江提督江楚總督專案具奏議將口糧酌減乃爲定  
額亦須優於陸兵庶不至似今日綠營之廢弛

第十三條哨官額缺

長江水師副將營協標哨官額缺應設都司二缺守備三缺千  
總十缺把總十二缺外委十六缺參將營哨官額缺應設都司  
二缺守備二缺千總八缺把總九缺外委十二缺游擊營哨官  
額缺應設都司二缺守備一缺千總四缺把總六缺外委十缺  
以上各營哨官皆以各員所管之船爲缺不設衙署

第十四條另給座船

長江水師提督給座船四號總兵給座船三號副參游給座船  
二號各營哨官都司守備以下直至外委皆無衙署每哨各給  
座船一號以抵陸營衙署馬匹之費提督每座船月支價銀十

六兩總兵副參游每座船月支價銀十四兩都守以下每座船月支價銀十二兩

第十五條出缺遴補

長江水師哨官缺出都守千把外委五項應全歸長江提督主政卽就長江水師中遴員題補其營官缺出副參游三項擬以七成歸長江水師中題補以三成由兵部就各省水師中推補至總兵缺出由長江提督兩江總督湖廣總督三人各保堪勝人員平日開單保奏屆時恭候

特旨簡放

第十六條餉項出入報銷

長江水師上下五千里分防五省若向五處藩庫領餉分歸五省報銷殊覺散漫無紀戶部難於稽考而各處入款俱有常額若添此項兵餉殊覺別籌維艱查沿江釐卡皆係水師恢復之地水軍歷年口糧多取諸此今長江既立經制水師酌定永遠章程凡俸廉糧餉船礮子藥一切費用應酌留釐卡數處在兩江境內者歸江甯鹽道經收在兩湖境內者歸武昌鹽道經收每年屆發餉之時其在楚境各營造冊呈明湖廣總督長江提督赴武昌鹽庫支領其在江境各營造冊呈明兩江總督長江提督赴江甯鹽道庫支領江楚兩總督每年各自具本題銷不彙入各省藩庫奏銷案內以免牽混

第十七條三處設藥彈局

長江永師礮位大者千餘斤次者亦數百斤所須子藥最多須常設子藥局以資操演而備不虞查湖北省城安徽省城造藥均有牛礮最爲穩便該二省應各設火藥局常川製造江蘇江西應辦硝斤協濟安徽藥局湖南應辦硝斤協濟湖北藥局至生鐵產於湖南應在長沙設立子彈局常川製造封門大子熟鐵羣子分解湖北安徽兩省所有楚境各營均赴武昌請領子藥江境各營均赴安徽請領子藥至三局造辦子藥之費由武昌江甯兩鹽道庫於釐金項下撥給

第十八條三處設立船廠

長江戰船大礮震驚最易朽壞定每屆三年修理一次十二年  
卽行更換應於湖北之漢陽江西之吳城江南之草鞋夾三處  
各設船廠排定子丑寅卯等年某年應修整某營某哨之船某  
年應更換某營某哨之船輪流興工江境兩廠由兩江總督暨  
長江提督委員監修楚境一廠由湖廣總督暨長江提督委員  
監修所有船廠經費亦由江甯鹽道武昌鹽道兩庫撥給其風  
篷一件三年卽須更換一次桿索纜絳等物每屆修整之年亦  
須酌量添換均准在於船廠請領

第十九條雨篷旗幟等費

長江戰船并無竹篷木舳惟以布棚遮避雨露霜雪名曰雨棚

最易朽腐又如錨本腦索礮繩旗幟紅油白油等項均須時常  
修換不能待三年之期亦不能赴船廠請領此五者名曰雜費  
酌定長龍戰船每年發銀六十兩舢板戰船每年發銀四十兩交  
該哨官採辦修飾以壯軍容江境之船由江甯鹽道發給楚境  
之船由武昌鹽道發給

### 第二十條廉俸兵米

長江水師提督現擬文武兼用其養廉應卽加重每年支銀八  
千兩其餘俸薪蔬菜燭炭心紅紙張等項均照陸營提督之例  
支給自總兵以下直至千把凡養廉俸薪蔬菜燭炭心紅紙張  
等項均照陸營之例發給外委准食柶糧雙分仍每年支養廉

銀十八兩惟綠營之例馬改爲水師之座船其水師官兵應領之米照各省綠營陸兵例每人日支八合亦由江甯鹽道武昌鹽道兩衙門於釐卡項下購米按季支發以上子藥局船廠雜費廉俸兵米四條均彙入正餉案內題銷

### 第二十一條禁約三事

長江水師舊日營規甚嚴近來日就鬆懈今立爲經制水師應申明定規三條決不可犯者一曰不許登岸居住二曰不許吸食洋煙三曰不許賭博如有登岸居住吸食洋煙者官則革職兵則革職有犯賭者由該管將領察核情節稟明嚴辦

### 第二十二條疏防處分

現在髮逆肅清長江水師各分汛地專以驅逐游匪嚴防劫盜  
爲重倘有水盜划船劫搶巨案逾限不獲由長江提督專案參  
劾不得以陸營尙未開參文員尙未開參稍涉推諉遲延以重  
江防而絕盜風

第二十三條已保官階大者借補小缺

長江水師設立營汛待部議准後卽須補放實缺查軍興十餘  
載水師員弁所保官階提鎮居多副參游亦不少所設營缺有  
限應以保舉較大之階借補較小之缺由臣等會同長江提督  
開單奏補其現在勇丁營制俟部議准後應卽陸續遣撤一俟  
勇營撤畢卽照新定兵丁餉章發給

第二十四條不准私借戰船

長江水師各有汛地不得私離且長龍舢板均係官物非同私物可以借用凡各省文武出差人員雖有緊急公務非奉有長江提督及五省督撫專札派坐戰船者不得私借戰船乘坐以圖便易違者照不應馳驛妄行馳驛例議處各營哨官非奉有專札而以戰船私借客官及朋友乘坐者照私離汛地例議處

第二十五條船式礮數

長江水師修造戰船式樣長龍底長四丈一尺底中寬五尺四寸舢板底長二丈九尺底中寬三尺二寸督陣舢板略加長大長龍設大礮前後左右六位舢板設大礮前後兩位左右設車

轉小礮兩位小鎗短刀長矛噴筒隨宜配用

第二十六條海口添造大船

狼山鎮總兵現改歸長江提督管轄該處江寬自餘里洪濤浩汗海風不測長龍舳板船身太小有風卽不能出港狼鎮所轄均係洋面近來甯釣沙船帶有礮位槍械每以捕盜爲名趁風行劫擬每營造大舳板二十號并造大船數號如紅單拖罟式樣多安礮位巡緝內洋以壯聲威又擬造輪船數號分布狼山崇明等處於江海防務更資得力

第二十七條不准私設礮船亦不許水師干預鹽務

礮船爲江中利器然可以禦暴亦可以爲暴如准商民私造礮

船則強盜亦可造礮船以行劫鹽梟亦可造礮船以護私假各  
偽旗萬難稽查此後既立長江經制水師應將民間私造礮船  
一概禁革雖文武官員亦不准私設礮船以杜奸民影射難於  
查察如有私立礮船不立時稟報者惟該汛之水師是問至巡  
緝私鹽本以礮船爲最便然亦只准於瓜洲漢陽兩鎮標下奏  
派戰船若干號巡緝某處其未經奏派之戰船概不准干預鹽  
務尤不准包庇私鹽如有包庇者由兩江總督湖廣總督嚴行  
參辦

第二十八條建衙經費

長江水師提鎮暨副參游駐紮之處均須設立衙署軍裝卽取

諸酌畱釐卡一俟部議覆准卽由臣等會同江楚總督長江提督派員勘估次第建造事竣核實報銷

第二十九條沿江舊日水師改隸長江提督

江南之京口狼山等營江西之湖口營湖北之漢陽營湖南之岳州等營凡向有水師之名而無礮船之實者今各該處均立標營改從新章應悉歸長江水師節制以昭畫一其向無水師名目者不必更改

第三十條考糧考缺操演章程

水師以使船爲第一義善放礮次之凡考槳糧須令一人駕一小划渡江一兩次凡考礮糧須令連放五礮無走火遲鈍等弊

凡考應升應補之缺須令數船於無風之日盪槳逆行三十里  
驗其遲速其哨官仍考試技藝以定等差至校各鎮之優劣每  
年春季長江提督會同兩湖總督調集岳州漢陽二標在於武  
昌江面或武漢各湖簡閱一次秋季會同兩江總督調集湖口  
太平瓜洲狼山四標在於黃天蕩等處簡閱一次閱畢會摺具  
奏優者酌量保獎劣者分別參辦

長江水師營制

一岳州設立總兵設中軍中營游擊用船三十三號仿參將營之例分防自陳陵磯起至鹿角壘石瀘陵潭湘陰一帶

一沅江設立參將屬岳州鎮左營分防君山西湖及常德龍陽華容等河出湖之處但不進防內河其沅湘等水應由湖南另行設防

一荊州設立副將屬岳州鎮後營分防自荊州以下江面石首監利一帶至荊河口止

一陸溪口設立游擊屬岳州前營分防自荊河口以下江面螺山新堤及倒口以內之黃蓋湖

一麻州設立參將屬漢陽鎮後營分防自倒口以下江面至沌口止兼防金口以內之斧頭湖

一漢陽設立總兵設中軍中營游擊用船三十三號仿參將營之例分防自沌口以下江面至團風止并防省城兩岸後湖青林箐湖其漢水上通樊城一千餘里及各支河汊湖應由湖北另行設防

一巴河設立游擊屬漢陽鎮右營分防自團風以下江面黃州蘭溪至道士汛止並防樊口以內之樑子湖

一田家鎮設立副將營屬漢陽鎮前營分防自道士汛以下江面漳源口蘄州武穴至陸家嘴止并防漳源口及隆平以內之

湖

一湖口設立總兵設中軍中營游擊分防自陸家嘴以下江面九江十八號至老洲頭止

一吳城設立參將屬湖口鎮左營分防自湖口以內姑塘南康渚磯一帶

一饒州設立參將屬湖口鎮後營分防都昌鄱陽康山一帶其彭蠡湖東通廣信樂平浮梁各河南通省城贛江均由江西另行設防

一華陽鎮設立游擊屬湖口鎮右營分防自老洲頭以下彭澤香口至東流止並防吉水溝以內各湖

一安慶府設立副將屬湖口鎮前營分防自東流以下江面黃石磯李陽河一帶至樅陽止并防北岸鹽河及樅陽以內之湖南岸通殷家匯之河

一大通設立參將屬提標後營分防自樅陽以下江面池州土橋一帶至荻港止

一蕪湖設立游擊屬提標右營分防自荻港以下江面至裕溪口止並防灣沚青弋江等內河

一裕溪口設立參將屬提標左營分防江面東西梁山至金柱關止並防運漕巢縣無爲州各內河及巢湖百餘里

一太平府設立提督衙署設中軍中營副將分防金柱關以下

江面至烏江止

一金陵草鞋夾設立參將屬提標前營分防自烏江以下江面至通江集止并防江浦六合之內河

一瓜洲設立總兵設中軍中營游擊分防自通江集以下江面至焦山止并防內河至揚州止自揚州以上高郵寶應諸湖應由淮揚鎮總兵另行設防

一孟河口設立游擊屬瓜洲鎮右營分防南岸各夾江自焦山起至江陰口止其南岸各內河兼田松江提標另行設防

一三江營設立游擊屬瓜洲鎮左營分防北岸各夾江自焦山起至靖江口止其北岸各內河應由淮揚鎮標另行設防

一江陰設立副將屬瓜洲鎮前營分防自江陰口以下江面至鹿苑港止及常陰壽興等沙其鹿苑港以下由福山鎮標接防

一狼山鎮總兵卽舊日所設者應添設兩營水師兼隸長江水師提督管轄查狼山鎮原統中左右三營鹽捕揚州三江秦州秦興掘港六營共九營今擬一切悉仍其舊惟於通州設一游擊名曰綏通營分防自靖江八圍港以下江面至通州止其船用長龍二號督陣舢板一號二十人之大舢板十號十四人之舢板十號仍酌添紅單拖罟等船

一海門廳設立副將名曰綏海營分防由狼山至海門一帶北岸江口海汊其船隻用長龍二號督陣舢板二號大舢板二十

號仍酌添火輪船並紅單拖罟等船至崇明一帶南岸海汊則歸江南提督分防

以上新設岳州鎮標四營漢陽鎮標四營湖口鎮標五營提標五營瓜洲鎮標四營添設狼山鎮標二營共二十四營內副將六營參將七營游擊十一營

賊萃湖北派大軍援鄂摺

同治四年十二月二十八日

奏爲兩路捻黨全萃湖北又有叛勇之變現派大軍援鄂恭摺  
仰祈

聖鑒事竊任賴牛李各酋於上月竄擾光固並檄飭劉銘傳進  
勦該軍以車輛未齊尙未起程旋報該逆已由麻城竄入鄂境  
接據道員黃家駒等來稟成大吉所部十營原紮宋埠地方忽  
於本月初二口以索餉爲名燒營謀變該統領親出彈壓亦受  
二傷越三日僅得破圍而出其部下弁勇多已從亂聞游匪唐  
姓實爲主謀勾通捻匪遍擾黃安黃岡黃陂孝感等縣其張總  
愚新野一股亦已竄至樊城游匪蠡起襄陽日眾旋又接得官

文函牘請

臣

派兵由麻城黃安援鄂情詞甚切

臣

一面商之兵

部右侍郎彭玉麟

麟

令總兵喻俊明等率帶師船駛赴武漢一面

檄調直隸提督劉銘傳一軍自周家口馳赴光固麻城徑援黃

州劉銘傳未接

臣

檄之先亦有呈文前來自請率師援楚據稱

車輛駱駝俱已辦齊卽日可以成行

臣

處惟該軍人數較多距

鄂境較近當不至稍涉遲延惟周家口至黃州尙有七百餘里

恐我軍趕到該逆又有變動論

臣

處之馬隊太少則楚中利用

步兵而淮軍之剿辦稍易論

臣

處之糧運維艱則豫中已有頭

緒而湖北之另籌更難

臣

前屢次具奏但任十三府州之地厥

後東路無賊乃推廣及於陳許南汝光五郡今則直隸齊豫三

省皆已無賊自未可堅持初議惟當窮賊之所往不計遠近竭力之所能不計利鈍以期有補於萬一而已所有捻黨叛勇全萃湖北現派大軍援鄂緣由恭摺由驛五百里具奏伏乞

皇太后

皇上聖鑒訓示謹

奏

查獲山東撫藩等參款摺 同治四年十二月二十八日

奏爲遵

旨密查山東巡撫藩司等被參各款恭摺覆陳仰祈

聖鑒事竊臣於本年六月十四日承准軍機大臣密寄同治四

年六月初八日奉

上諭有人奏僧格林沁在山東督師剿賊經四十餘州縣闔敬  
銘安坐省城不爲援應并飭州縣不准支應口糧該親王函致  
該撫赴曹助剿該撫藉防河爲名竟往東昌迨該親王殉難疾  
馳回省將家眷裝扮民婦送往署齊河縣知縣李均署中李均  
與該撫係屬親戚以候補知縣久署齊河美缺在省開設錢店

銀樓等鋪每七八日赴省一次寓居鋪內招妓聚飲便衣小帽  
出入撫衙該撫將其列入賢能奏保升階丁寶楨在曹州防堵  
迄未與僧格林沁會合亦從未獲一勝仗所部勇丁在濟甯焚  
搶肆無忌憚兗沂曹濟道盧朝安隨國瑞駐劄濟甯於僧格林  
沁追剿喫緊之時該道約同城官員逢迎國瑞開筵痛飲演戲  
三日該親王凶問之來正在恆舞酣歌之際候補道王繼庭聞  
係闔敬銘私人以官爲幕居住撫衙本係坐辦文案該撫列入  
勦賊案內免補知府保升道員各等語以上各情是否屬實有  
無其事著曾國藩詳細嚴密訪查據實具奏毋稍徇隱原摺片  
著鈔給閱看將此密諭知之欽此七月十一日准兵部火票遞

到軍機大臣字寄同治四年七月初五日奉

上諭有人奏髮捻各匪竄入東境巡撫毫無布置藩司縱勇殃  
民恐誤大局一摺據稱張總愚等股由河南竄入東境旋擾江  
南贛榆復回竄山東郟城等境僧格林沁盡力追勦闔敬銘安  
坐省城並不發兵守隘任賊奔突致該大臣遇伏陣亡藩司丁  
寶楨帶勇出省行至蘭山縣聞賊竄江南並不擇要駐紮邊賊  
歸路輒卽折回嗣復出省防堵離賊甚遠始終未與賊遇並縱  
令兵勇淫掠焚擄闔敬銘置之不問各等語以上所奏該撫等  
措置失宜各情如果屬實殊負委任卽著會國藩按照所參各  
節確切查明據實具奏毋稍徇隱另片奏山東郟城縣知縣周

士溥於賊匪攻撲楊家圩之時並不督率兵勇力爲援救以致  
被匪攻陷肆行殺戮情殊可恨著該督一併查明參辦原摺片  
均著鈔給閱看等因欽此臣博訪該省官紳並派員赴東密查  
雖未必洞悉毫芒亦已粗得崖略如原摺稱僧格林沁在山東  
督勦經四十餘州縣閣敬銘不爲援應該親王函致該撫赴曹  
助勦該撫藉防河爲名竟往東昌等語查僧格林沁今年督師  
山東經過曹縣定陶菏澤鄆城鉅野嘉祥濟甯甯陽曲阜汶上  
東平滋陽鄒縣滕縣嶧縣蘭山郟城共歷十七州縣其中雖有  
數縣再過者然實無四十餘縣之多馬步諸將現在臣處言之  
甚詳僧格林沁亦無緘致該撫赴曹助勦之事諸將皆略知之

該親王居心仁厚深知各省大吏多不能親臨行陣故但見調將領隨勦之檄從未見調巡撫會勦之文不獨山東然也至東昌防河係遵奉屢次：

寄諭先期奏明而往惟該親王殉難後闕敬銘不應疾馳回省彼時賢王新逝遠近震動該撫但宜進駐汶上東平以定眾志不宜蹙回省城以惑軍心此軍事閱歷太少之失也至將家眷裝扮民婦送往齊河縣署則臣歷詢往來各員皆稱未聞此說擒匪向不攻城眾所共知當曹南警信至時鄉民紛紛避亂挈眷進省豈有舍省垣鞏固之區趨旁邑彈丸之地此不待辨而可明者其各物令請餉接濟大營該撫駁斥一節查山東協餉

五萬兩按月批解絲毫無誤戶部有案可稽卽該親王身後糧  
台尙餘銀二十餘萬亦足爲餉項無絀之證聞各州縣或因養  
勇練團稟請動用正項闕敬銘疑其浮銷多從駁斥該撫自負  
清正往往以不肖待人僚屬怨其刻覈要其於僧格林沁傾心  
敬服固一無所吝也原摺又謂闕敬銘請添幫辦之疏在該親  
王陣亡後一日所發佯爲不知故示先見果若所言心術豈復  
堪問查僧格林沁於四月二十四夜殉節其時敗兵四散臣詢  
之翼長陳國瑞常星阿等二十五日午刻尙不知該親王存亡  
確耗國瑞近在濟甯距鄆城僅二百餘里二十七日始得眞信  
飛章入奏闕敬銘時在荏平距鄆城四百餘里聞此摺係二十

五日所發其爲不知主帥已死當無疑義且賢王已逝而僞奏以誦先見之明此至愚之小人所不忍爲豈閻敬銘而爲之乎原摺又謂齊河縣知縣李均與閻敬銘係屬親戚列入賢能奏保查李均之弟內閣中書李應萃與該撫爲親戚齊河一缺係前任撫臣譚廷襄所委閻敬銘因之久未調動又將齊河本任之張聯奎另案甄別酌改簡缺又將李均列入賢員保舉升階外閒旣疑張聯奎之被劾係爲李均騰挪斯缺又疑李均之得舉毫無善政可紀物議多爲不平李均於省城西門內開設麟芝公錢店漆店麟芝藥棧原摺所指均屬確鑿其招妓聚飲查無實據而率意妄行寡廉鮮恥則眾論多與原奏相符此訪查

閣敬銘暨附參李均之梗概也原奏所稱山東布政使丁寶楨帶勇擾民一節查丁寶楨以癸丑庶吉士回籍捐資募勇毀家紓難在安平鎮遠一帶屢立戰功蒙恩簡放岳州府知府擢署陝西臬司適值湖南撫臣毛鴻賓奉募勇援剿山東之

旨遂奏令丁寶楨帶勇改赴東省旋授山東臬司該司所帶僅有湘勇千人厥後陸續增募亦僅步隊二千六百人較之捻黨馬步數萬眾寡懸殊本年二月初間帶兵出省甫至曹縣賊已由東明一帶竄入定陶遂與僧格林沁分道跟追二月十六日曾在甯陽縣獲一小勝三月二十四日接僧格林沁之札以賊

擾沂州恐由莒州日照東趨飭丁寶楨卽折赴歷城章邱交界之龍山鎮堵禦甫經赴防又接該親王札飭仍回嶧縣駐紮原摺所參四月初二日折回省垣初五日復防東平不知其一往一返皆係奉札而行也四月初二日其部將戰賊於大泛口十一日丁寶楨親自截賊於滕縣之臨城驛殺傷過當十三日與僧格林沁相遇於道頗加慰勞飭令暫回濟甯防守原摺所稱始終未與賊遇并未與該親王接見者殆係傳聞失實之詞該司帶勇恩多於威誠不免於騷擾然並無淫擄重情及畏楚勇甚於畏賊之謠逮僧格林沁殉節以後各路敗兵游勇齊集濟甯凡他營不法之案亦或歸咎於該司部下丁寶楨深爲憤懣

鬱鬱恆不自得閻敬銘亦重其才而思全其名將所部改隸他將飭回藩司本任該司心地光明辦事結實山東官民實無閒言此訪查藩司丁寶楨之梗概也原摺所參兗沂曹濟道盧朝安候補道王繼庭一節查盧朝安係捐納佐雜出身前任單縣知縣時藉團練爲名勒索富紳朱姓財物久爲眾所指目在濟甯任內辦理大營糧台本年四月與紳士姚姓飲酒觀戲忽傳僧格林沁凶問倉皇驚散雖無約同都司周貞元章京玉姓邀請國瑞之事而原摺所指多屬得實閻敬銘亦素惡其人今盧朝安已告病開缺物論猶共鄙之候補道王繼庭前在青州府任爲巡撫文煜奏參革職閻敬銘因其熟悉例案延之入幕佐

理文書動中窳要該撫於公事極爲認真與該道熟商近以交代款項參劾多員閒有過當之處外閒疑出王繼庭之意遂共怨其刻薄因并疑其專擅至並未打仗列入保單一層近日疆吏於得力幹員附入戰功通融入奏久爲軍營積習各省皆然蓋統領營官之文案皆得保獎而督撫之文案獨令向隅情勢有所難行其中固有冒功倖進者亦有愛惜人才借此以振拔淹滯者顧督撫之心公私何如所保之人邪正何如耳王繼庭未臨行陣自不能爲之諱而廉正精細尙屬有用之才此訪查盧朝安王繼庭之梗概也原奏所稱郟城縣西楊家圩被賊攻陷知縣周士溥並不救援一節臣另派一員往查據稱捻逆於

三月初自費縣蘭山境內西北界柳莊圍三十里至重坊圍十里至曹家樓圍十里至丁家溝圍五里至亭子廟圍三十五里至東南鄉紅花埠圍遂入宿遷桃源界內並無楊家圩名目細問居民俱言亭子廟圍內團長楊倬係已革文生或卽楊家圩之誤圍中居民百餘家搶匪來時並未圍攻三月二十日仍從東南竄回西北亦未圍攻破寨則所稱周士溥坐視不救係屬訛傳似無疑義此又訪查郟城民圩之梗概也維臣仰承聖主垂詢固不肯摭拾浮言淆亂是非亦何敢稍涉偏徇上負朝廷好問察言之意就臣所查者酌加擬議藩司丁寶楨功多過少眾望允孚似應免其置議究沂曹濟道盧朝安心術險鄙

聲名尤劣雖經告病開缺未便姑容似應勒令休致候補道王  
繼庭才尙可用並無劣跡似應開復原官撤銷道員候補知府  
署齊河縣知縣李均貪鄙妄爲似應卽行革職郟城縣知縣周  
士溥似可無庸置議巡撫閻敬銘應如何量予處分之處恭候  
欽定所有遵查山東巡撫藩司被參各款緣由恭摺由驛具奏  
伏乞

皇太后

皇上聖鑒訓示謹

奏

酌撥馬隊馳赴奉天剿賊摺

同治五年正月十四日

奏爲遵

旨酌撥馬隊馳赴奉天剿賊恭摺仰祈

聖鑒事竊臣承准軍機大臣字寄同治四年十二月二十四日

奉

上諭本日據文祥等奏奉天剿辦馬賊緊要請調烏爾圖那遜統帶土默特本部兵丁百餘名前赴奉省調遣等語烏爾圖那遜所部兵丁爲數無多諒尙可以抽撥著曾國藩卽飭該員迅帶所部馳赴奉天省城聽候文祥等調遣勿稍延緩等因欽此伏查親王僧格林沁舊部臣於上年八月挑畱馬兵九百六十

八員名馬勇四百四員名歸色爾固善統帶曾於八月十七日  
奏明在案厥後挑留馬兵五百三十三員名交烏爾圖那遜管  
帶其土默特一起出征年久殘廢居多除酌留數員外業經全  
數遣撤回旗亦於十月三十日奏明在案色爾固善所統三起  
去秋赴山東一次現駐河南陳州府烏爾圖那遜所帶一起  
派歸劉銘傳統轄久在周家口駐紮頃據劉銘傳文稱已於十  
二月二十四日拔營赴鄂援剿又據烏爾圖那遜稟稱於二十  
六日隨同銘軍前進并以舊傷復發請假醫治前來臣批准給  
假一月飭令該軍隨同劉銘傳迅速援鄂現計已入楚境不特  
該參領請假醫傷難遽北行卽鄂中賊勢正熾劉銘傳攻剿正

殷亦不能將此起馬隊撤回且由楚赴遼程途太遠僅調弁兵百餘名爲數太少誠恐於事無濟反覆籌思奉天實爲根本之地陳州現非喫緊之時尙可移緩就急惟有將色爾固善一軍派赴關東歸文祥調遣程途較近人數較多當於大局有裨色爾固善所統三起中有訥穆錦一起徐州馬勇四百餘人不善放槍臣已札飭全數遣撤其伯都訥副都統高福一起漢軍副都統托倫布一起共計九百餘人均係吉林黑龍江弁兵久從征役還救桑梓或可竭力剿辦勉奏膚功除檄飭色爾固善等卽日遵照啓程外所有遵撥馬隊馳赴奉天剿賊緣由恭摺由五百里覆奏伏乞

皇太后

皇上聖鑒訓示謹

奏

近日軍情并將湖團分別撤畱片

同治五年正月十四日

再擒匪兩路入鄂又有叛勇之變湖北喫緊臣檄銘軍由光固  
進援黃州於十二月二十八日奏明在案旋據各路文報該逆  
分擾蕪水羅田境內四出焚掠成大吉潰勇雖已招集七營而  
軍心未定殊不足恃張總愚一股又由楚境折回河南葉裕等  
屬并有東竄之意劉銘傳一軍此時計已抵鄂未知能力挫兇  
鋒以紓鄂人之患否本擬令李昭慶一軍迅赴豫省因湖團一  
案未清尙恐稍煩兵力臣與地方各官再四籌商議定將安分  
之唐趙等團畱住徐州將勾賊之王團容賊之刁團逐回山東  
勒限正月十五以前撤歸本籍如有抗拒遷延卽派兵剿辦一

後此事辦妥李昭慶卽於燈節後統帶馬步各營馳赴周家口  
如張總愚東竄齊省則令李昭慶跟蹤追剿除湖團一案另行  
詳細奏結外理合附片陳明伏乞

皇太后

皇上聖鑒訓示謹

奏

請令劉秉璋襄辦軍務片

同治五年正月十四日

再臣

近來目力昏花心血愈耗精神迥不如前久膺艱鉅終虞

僨事必須得人相助爲理庶可彌縫其失而佐其所不逮查有

翰林院侍講學士劉秉璋隨同江蘇撫臣李鴻章轉戰蘇常屢

著功績該員志趣堅卓精實耐勞籍隸廬江與淮軍均有桑梓

親舊之誼若令襄辦臣處軍務應可聯絡諸將獨當一面現在

淮軍文武各員如劉銘傳潘鼎新張樹聲等并蒙

聖主鴻恩次第嚮用此外又有翰林院編修張錫嶸籍隸淮北

其堅卓耐勞與劉秉璋相等惟軍務閱歷尙淺將來磨厲戎行

多更事變似亦可爲

國家肩任艱鉅臣於咸豐十年六月奏請將候補四品京堂左

宗棠襄辦臣處軍務荷蒙

諭旨允准今臣精力更遜而捻匪所到之處縱橫三千餘里深

恐照料難周合無籲懇

聖恩飭令翰林院侍講學士劉秉璋襄辦軍務實於大局有裨

如蒙

俞允或令該員駐紮徐州或駐襄陽南陽容臣察看情形續行

具奏理合附片陳請伏乞

皇太后

皇上聖鑒訓示謹奏

查辦湖團酌籌善後事宜摺

同治五年二月初八日

奏爲查辦湖團分別畱遣并酌籌善後事宜擬議結案恭摺馳  
陳仰祈

聖鑒事竊臣於上年奏復軍情摺內附陳銅沛境內有與剿捻  
相關之湖團一案亟宜查辦以杜後患今年正月復將通賊之  
王刁兩團勒限驅逐安分之唐趙等團仍畱徐州先後具奏在  
案查湖團者山東曹屬之客民墾種蘇齊交界之湖地聚族日  
眾立而爲團也該處濱微山昭陽兩湖西岸南迄銅山北跨魚  
台縣互二百餘里寬三四十里或二三十里不等其在魚台之  
團有二曰魏團任團其在銅沛之團有八曰唐團北王團北趙

團曰南王團南趙團曰于團睢團侯團均以首事者之姓爲名  
昔之侯團卽今之刁團也魚台兩團以東民居東境人數寡而  
墾地少一經官爲處置漸以相安無事惟銅沛之八團人數眾  
而墾地多主客構訟幾成不可解之仇溯查咸豐元年黃河決  
於豐工下游沛縣等屬正當其衝凡微山昭陽之湖地銅沛魚  
台之民田均已匯爲巨浸一片汪洋居民流離轉徙以爲故鄉  
永成澤國不復顧戀矣厥後咸豐五年黃河決於蘭儀下游鄆  
城等屬正當其衝於是鄆城嘉祥鉅野等縣之難民由山東遷  
徙來徐其時銅沛之巨浸已爲新涸之淤地相率寄居於此墾  
荒爲田結棚爲屋持器械以自衛立團長以自雄前任徐州道

王夢齡以其形迹可疑飭縣押逐回籍繼而來者日多復經沛縣稟請以東民實係被災困窮擬查明所佔沛地押令退還其湖邊無主荒地暫令耕種納租經前河臣庚長批准旋議勘丈湖荒分爲上中下三則設立湖田局招墾繳價輸租充餉又飭於沛圍交錯之地通築長隄名曰大邊以清東民與土民之界限遂得創立各團據爲永業此東民初至畱住湖圍之情形也銅沛之士民當豐工初決時流亡在外迨後數載還鄉睹此一片汙地變爲山東客民之產固已心懷不平而官長議定所佔沛地押令退還者又僅託諸空言并未施諸實事且同此巨浸新涸之區孰爲湖荒孰爲民田茫無可辨沛民之有產者旣恨

其霸佔卽無產者亦咸抱公憤而團民恃其人眾置之不理反或欺侮土著日尋鬪爭遂有不能兩立之勢咸豐九年侯團窩匪搶劫銅山之鄭家集經徐州道派兵拏辦并將該團民驅逐出境另行遴董招墾輾轉更置是爲今之刁團同治元年又有東民在唐團邊外佔種沛地設立新團屢與沛民械鬪爭控至三年六月遂有攻破劉莊寨連斃數十命之事經漕臣吳棠飭派徐州鎮道帶兵剿辦平毀新團此咸豐六七年後客民擅逞疊釀巨案之情形也新團旣毀檢斬至千人之多并將團地退出謂可抒沛民之憤而折其心矣乃沛人貢生張其浦張士舉文生王獻華等與劉莊事主劉際昌先後赴京以新團一案唐

守忠主盟指使情同叛逆請將各舊團一概剿辦各情在都察院呈控欽奉

諭旨交吳棠等密速查辦旋經吳棠以唐守忠來團最早其名特著核諸所控各辭毫無實據且與原呈不符不過欲將新舊各團一概驅逐而奪其成熟之田等語復奏在案而浦人紛紛構訟仍復不休臣博採輿論昔年銅浦受害之家被水而田產盡失水退而田復被佔其懷恨興訟自出於情之不得已近則構訟之人并非失業之戶不過一二刁生劣監設局斂錢終歲戀訟不特團民苦之卽土民亦以按戶派錢爲苦而主訟者多方構煽旣以強客壓主激成眾怒又以奪還大利動眾心官

長或爲持平之論訟者輒目爲受賄各團豈無安分之民訟者概指爲通賊初至有領地之價後來有輸地之租而訟者不問案牘之原委必欲盡逐此數萬人而後快此又新團旣剿以後沛民健訟不顧其安之情形也上年八月臣駐紮徐州銅沛紳民赴臣轅控告各團呈詞累數十紙臣以案情重大實兆兵端未敢遽爲剖斷至九月閒捻眾東竄遠近探稟均稱湖團勾賊訊據生擒賊供亦稱南王團有人函約賊來百口一詞雖反復研究未得主名而平時該團窩匪搶劫積案纍纍情實可信又刁團平日窩匪與南王團相等此次賊退之後臣飭徐州府縣親赴各團察看情形旋據復稱以擒首牛賴各賊目均住刁團

之中該團房屋糧草器具完好如故其爲縱容賊黨亦無疑義  
又稱唐團練董唐守忠其子唐錫彤其叔唐振海帶練擊賊力  
絀被執脅之以降罵不絕口同時遇害除王刁兩團外其餘六  
團或憑圩禦賊或圩破被害遭賊焚擄殺掠之情狀慙慙在目  
其爲并未通賊亦屬確有可據而沛縣上年京控湖團之王獻  
華等一聞湖團通賊之語復行聯名多人指控各團無非賊黨  
卽殉難甚烈之唐守忠仍加以叛逆之名稟請一律剿逐臣親  
提鞫訊原告旣多捏名供情亦多支飾其爲刁訟生事亦屬無  
可置辨臣乃剖別是非平情論斷不分土民客民但分孰良孰  
莠其有契串各據產業爲團所佔急求清還者是土民之良者

也無契串產業但知斂錢構訟激眾怒以興禍端者是士民之  
莠者也其平日安分耕種如唐團之拒賊殉節受害極慘者是  
客民之良者也其平日之凌辱士著如王團之勾賊刁團之容  
賊是客民之莠者也遂於臘月下旬通行曉諭飭令王刁兩團  
勒限正月十五日以前逐回山東本籍派劉松山帶兵前往彈  
壓頃據各州縣稟報該兩團業已全數徙去安靜回籍臣酌定  
善後事宜三條檄飭徐州道督同府縣次第經理一曰酌給錢  
文以卹已逐之團王刁兩團平日之窩匪去秋之通賊眾所共  
知然除首犯王長振罪在不赦外其餘要犯未能指出姓名應  
卽全數赦宥以安反側之心此外無辜之眾尤應酌加體卹同

沛

朝廷之澤現定於郟城縣設局將兩團原繳地價照數發還其  
兩團已種之麥現派徐州鎮兵在彼屯守待至四月收割估價  
若干以一半給屯田之兵一半給兩團之民庶東民回籍者不  
至流離失所矣二曰設立官長以安畱住之團兩團既去尙有  
唐趙等六團畱居徐境擬請設立同知一員俾客民有所依歸  
或令徐州同知移駐該處聽斷詞訟稽查保甲籌辦湖團一切  
事務俟二三年後安置既定仍將湖團地畝分歸銅沛兩縣奏  
明按地升科輸租執業以歸畫一各團所築大隄酌量平毀以  
期水利之通暢亦免畛域之太明團中如有窩匪通捻重情官

爲查明小則拏犯誅懲大則派兵剿辦視之同於土著永不再  
言驅逐之說亦不許土民妄控目爲畝匪字樣盡消爭訟之嫌  
同敦睦嫻之誼三日撥還田畝以平土民之心昔年東民開墾  
湖荒雖不免侵佔民田然爲數要不甚多今王刁兩圍退出之  
田六百五十餘頃以抵侵佔之數有贏無絀此項田產先儘失  
業之民凡有印契糧票者准其照數撥還無契票者概不准撥  
以示限制以斷葛藤其次則培植學校凡銅沛兩縣書院之膏  
火小考之卷價鄉試之賓興費會試之公車費各准撥田若干  
以爲造士之資縱使民田被佔契票無存私家偶失有限之田  
通縣共享無窮之利其餘則概充官田派兵屯種兵或不足召

民佃耕在銅沛可解積年之公憤在東民可免霸佔之惡名矣  
所有罵賊之五品頂戴州同銜前平陽屯屯官唐守忠其子文  
生唐錫彤其叔衛千總唐振海三名同時被害尤堪嘉憫應請  
旨交部從優議卹并建立專坊以爲草莽效忠者勸沛縣激眾  
構訟之文生王獻華應請褫革衣衿以示懲儆王長振現尙在  
逃俟緝獲之日盡法處治以爲通匪者戒未盡事宜除分咨江  
蘇山東督撫及漕督諸臣妥籌會辦外合將湖團一案擬結緣  
由恭摺馳陳伏乞

皇太后

皇上聖鑒訓示謹

奏

家法卷二十一

報啓行赴周家口日期片

同治五年二月初八日

再營務處李昭慶一軍於正月十九日自徐州拔營二十五日  
至歸德府臣將湖團一案奏結定於二月初九日啓程由充濟  
歸陳繞赴周家口就近調度并飭劉松山會同張詩日續赴湖  
北助剿漢黃一帶久已通飭遵照頃接李昭慶自柘城發來之  
稟據稱張總愚股匪現在西平遂平一帶意欲竄入山東各路  
生擒賊供皆稱賊圖東竄因改飭劉松山等仍駐徐州湖團等  
處俟東路無警再行西征赴鄂臣則又未便更改仍以初九成  
行理合附片馳陳伏乞

皇太后

皇上聖鑒謹  
奏

銘軍援鄂克黃陂縣城摺

同治五年二月十五日

奏爲銘軍援鄂克復黃陂縣城恭摺奏祈

聖鑒事竊劉銘傳一軍於上年十二月二十四日自周家口起  
行援鄂正月初間行抵羅山苦爲雨雪所阻二十日始克拔營  
二十四日行抵河口聞賊之大股盤踞黃陂縣城內卽由長仙  
嶺進規該縣二十七日行抵距城二十五里之王家河記名提  
督唐殿魁率師在下石港紮營城內出馬步賊數千直撲該營  
唐殿魁張景春率領田履安周志本等分頭迎剿陣斬數名賊  
勢不支紛紛奔潰張景春率馬勇百餘名追至西關外賊館手  
刃數賊身受矛傷三處唐殿魁督帶步隊各營繼進賊乃敗退

入城我軍亦各收隊生擒賊首宋矮子孫貴等二十餘人二十  
八日五鼓劉銘傳派令劉盛藻率所部六營由馬家山紮營攻  
城之東唐殿魁率所部六營由河邊紮營攻城之西自督黃桂  
蘭畢乃爾等由甘羅山下紮營直抵城根賊見大兵逼近於已  
刻出馬步賊萬餘人分數路來撲劉銘傳亦分數路迎剿唐殿  
魁督帶王德成滕學義朱起昌等分兩支攻賊步隊劉盛藻督  
帶劉盛休馮如霖龔元友等分三支攻賊馬隊黃桂蘭張士元  
張景春等繞攻賊後一合甫交賊即敗退入城其馬賊數千仍  
在城外東南一帶排列我軍乘勝攻城劉銘傳令畢乃爾李錫  
增由北門開礮王德成率勇首先登城頭受刀傷見骨賊猶未

退田履安丁汝昌劉朝幹韋和禮等復相繼熾附而上賊眾  
由東南兩門奔出當將黃陂縣城克復劉盛藻唐殿魁黃桂  
等督帶各營追殺至城東南二十里之茆屋店賊馬數千折回  
抵敵仍經我軍擊敗賊盡向新洲一路狂奔而去計陣斬賊二  
百餘名生擒七十四名奪獲騾馬三百餘匹救出難民男婦萬  
人我勇亦傷亡三十餘人銘軍遠道馳接近城卽戰擬在黃陂  
暫駐辦備行糧稍息士力卽行拔隊前去追剿等情由劉銘傳  
呈報前來臣查銘字全軍上年終歲奔馳夏閒長溝一戰而退  
山東之賊石弓山一戰而解雉河之圍秋冬阜陽之捷扶溝之  
捷均未開單請獎此次賊犯湖北該提督自請援鄂甫經到防

立克堅城實足寒賊膽而慰民心自應酌加獎勵以昭激勸直隸提督劉銘傳應請開復革職畱任處分仍交部從優議敘按察使銜補用道劉盛藻請

賞加布政使銜記名提督唐殿魁請遇有提督缺出儘先簡放記名總兵張景春請

賞加提督銜并

賞給勇號儘先總兵黃桂蘭畢乃爾均請

交軍機處記名遇有總兵缺出提奏補用并

賞加提督銜兩江補用副將馮如霖儘先副將田履安劉盛休周志本均請以總兵

記名簡放并

賞給勇號儘先副將聿和禮劉明幹均請以總兵

記名簡放參將銜補用游擊龔元友儘先游擊王德成均請免補參將以副將儘先補用王德成并請

賞給勇號儘先副將李錫增請

賞給勇號游擊滕學義朱起昌請以參將畱於兩江儘先補用都司丁汝昌請以游擊儘先補用并

賞加副將銜都司吳維章請以游擊儘先補用并

賞加參將銜已革副都統銜卽補參領烏爾圖訥遜請開復原官原銜陣亡之花翎守備陳福祿藍翎守備張思聰儘先守備

李先道藍翎千總錢萬桂四員請交部從優

賜卹其餘在事出力員弁上年阜陽案內業奉

諭旨准其列保可否容臣併案開單請獎出自

鴻施所有銘軍援鄂克復黃陂縣城緣由恭摺由驛馳奏伏乞

皇太后

皇上聖鑒訓示再臣於初九日自徐州啓行十五日行抵鄒縣

合併陳明謹

奏

鮑超軍北來剿擒籌定餉項摺

同治五年三月初五日

奏爲遵

旨檄調鮑超一軍北來剿擒并籌議有著之餉恭摺覆奏仰祈  
聖鑒事竊臣承准軍機大臣字寄正月二十三日奉

上諭現在東南雖已肅清而擒匪竄擾北路楚豫等省到處戒  
嚴防剿正當喫緊鮑超一軍前本令其馳赴北路助剿此時粵  
賊業已辦結卽著左宗棠飭令統帶所部迅赴楚豫之交聽候  
曾國藩調遣其江閩各路得力將弁兵勇有可調赴楚豫江皖  
助剿者并著曾國藩迅速函商左宗棠等酌量調往以期厚集  
兵力早殄逆氛等因欽此又奉二月初一日

寄諭嗣後江西浙江湖南每月可協濟甘省餉銀若干兩并協濟調赴鄂豫江皖助剿勇銀若干兩鮑超一軍調赴鄂豫約有若干名楚北可協濟此軍餉銀若干兩江蘇省能否於現協甘省月餉外再行籌添若干兩均著官文會國藩左宗棠李鴻章劉坤一馬新貽李瀚章妥籌速奏等因欽此又奉二月二十八日

寄諭鮑超奏拔營抵江擬請籌撥餉項採辦戰馬整隊赴豫一摺前因鮑超一軍調豫助剿曾經諭令官文會國藩將該營所需餉項函商奏撥茲據鮑超奏稱豫省地勢平曠利在騎戰現在派員採買戰馬并赴粵購辦馬槍等件俟馬匹到齊編立十

五營操練候調至所部新舊各軍月需餉銀九萬七千零馬隊編立照章需餉三萬四千零合共月需餉銀十三萬一千有奇此時東南軍務告竣江省各軍分別裁撤該營月需餉銀可否仍由江西籌撥馬隊均用洋鎗所需洋藥洋火請飭廣東陸續採運各等語著官文曾國藩懍遵前旨將鮑超軍營月餉迅速函商籌撥有著之款源源接濟如鄂省餉需缺乏不能全顧鮑超軍餉或由江西每月協濟若干亦著官文曾國藩酌度情形奏明辦理其洋鎗所需火藥等件應用若干并著官文等酌定數目咨明廣東趕緊籌解以利師行等因欽此并鈔示鮑超原摺到

臣臣

查捻匪萬騎縱橫行蹤剽疾而步賊則裹脅居多火

器極少

臣

所部湘淮各軍戰守俱優而騎兵則馬匹太少技藝

尤生是捻匪所長者在馬而不在步官軍所短者亦在馬而不

在步署督

臣

李鴻章近寄

臣

函謂宜裁減步兵酌添馬隊實屬

因時制宜之策鮑超所統步隊需餉至九萬七千有奇爲數過

多應令裁撤三千餘人酌留一萬二千人按鮑超向來營制可

編二十營每月給予餉銀七萬兩其馬隊之數應令招募三千

二百人按

臣

處新定營制可編十二營有奇每月給予額餉三

萬兩

臣

自抵臨淮以來察看皖北齊豫等省皆以柴草之故兵

民相爭動成仇隙因令各營發價購買柴草絲毫不妄取於民

閒鮑超一軍除口糧外又有柴草之費添換馬匹之費西洋軍

火之費雇買車輛駱駝以資陸運之費每月不下一萬四五千  
金通共供支該軍月需十一萬數千兩據鮑超原奏請全由江  
西籌撥不至缺乏其致臣書函亦稱將與撫臣劉坤一面商請  
供渠軍鉅款臣查鮑超一軍咸豐十一年馳援江西驅除李秀  
成巨股肅清全境同治三年再援江西許灣大捷挽回危局此  
次克復嘉應州俾江粵得以撤防有功於江西甚鉅卽以建軍  
之餉全資江西亦無不可惟江西須協解席寶田赴黔之軍而  
本省酌留防兵不無積欠雖劉坤一局量閎遠究恐力有不逮  
臣反復權衡擬請

旨飭下江西月解七萬供霆營步軍之餉湖北月解二萬供霆

營馬隊之餉江蘇月解二萬五千以一萬充馬隊口糧以一萬數千爲購買柴草車駝添補洋藥馬匹之用江蘇供應淮軍湘軍七萬餘人爲款極鉅茲又協濟鮑超軍餉業已入不敷出江西協黔協豫物力已竭該兩省除前此議定甘餉照舊按解外似不宜再添協甘之款

諭旨飭令浙江湖南協濟剿捻之餉銀又令廣東籌解霆營之洋藥臣今皆未議及蓋欲騰出浙江廣東之銀以大批協解甘肅騰出湖南之銀以全力專謀貴州也至剿捻之師新添鮑超一軍步隊愈厚馬隊亦不爲薄但患調度不善不患兵力不敷無庸再調遠兵致滋糜費相應請

旨飭下左宗棠劉坤一等將閩江各軍分別遣撤次第銷兵以靖民氣抑臣尤有慮者鮑超所部各營頗有騷擾之名每當拔營沿江行走擄掠船隻舟人畏避市肆驚惶去歲金口之變沙井之譁尤爲人所詬病然猶有可原者前此餉項支絀士卒終歲無銀寄家閒或食米稍缺將領不能以空言撫慰故號令有所不行今旣籌得有著之款十一萬餘兩應卽在於襄陽設立該軍糧臺派襄陽道總司其事仍由江西派一委員駐臺支應步軍口糧湖北江蘇各派一委員駐臺支應馬隊口糧及洋藥器械等事步軍欠餉將來仍由江西找補馬隊欠餉將來仍由湖北江蘇找補俾鮑超得以專精辦賊不分心於管餉以符原

奏之意河南民圩恨兵如仇積怨已久必須秋毫無犯乃可挽回此風軍民一氣靈營月餉充足如再有騷擾情事臣必據實參奏請將該軍遣散一以保全鮑超之令名一以拘循河南之赤子紀律所在關係甚重不得不預先陳明善全終始所有遵議鮑超剿捻籌定餉項緣由恭摺由驛馳奏伏乞

皇太后

皇上聖鑒訓示謹

奏

近日軍情暫駐濟甯就近調度摺同治五年三月初五日

奏爲陳報近日軍情微臣暫駐濟甯就近調度恭摺仰祈

聖鑒事竊臣於二月十五日在鄒縣拜摺後十九日行抵濟甯

擬卽暫駐數日閱視黃運兩河與護撫臣丁寶楨等妥籌布置

再由曹州赴豫尙未成行次日卽聞張總愚大股由豫入東之

信續據各路稟報二十二日該逆竄至曹縣二十四五等日遂

由荷澤定陶擾及鉅野鄆城二十六夜攻破鉅屬之太平寨圩

盤踞該寨擄人擄糧有必欲渡運之勢臣於二十日飭令山東

臬司潘鼎新一軍酌酌四營防守濟甯而自帶八營馳赴嘉祥

鉅野相機剿辦另調湘軍三營自徐州來濟換防騰出潘鼎新

之軍均赴前敵其自濟甯以上之開河袁口一帶水勢極淺爲  
該逆渡運熟經之地丁寶楨以五千人分扼其關而親駐袁口  
督飭防範本省防邊之軍紮於豫東界上者一爲曹州金隄集  
楊飛熊之師一爲曹縣魏家灣王心安之師賊皆繞越營外深  
入腹地該兩軍先後追剿楊飛熊一軍二十六日在曹州之安  
興寨接仗先勝後挫王心安一軍二十八日在鉅野之龍堽集  
接仗挫損尤甚該兩將勇於赴敵身受多傷臣咨商撫臣將兩  
軍調赴運河以東憑河堵禦藉固北路之防而免偷渡之患該  
逆在太平寨盤踞四日潘鼎新於二十九初一日出隊搗戰  
該逆一見旌幟卽行退避初二日潘鼎新進攻太平寨該逆已

全數北竄梁山有銳欲渡運之象運河汎地太長防兵太薄不知果足以扼之否此山東各軍堵剿之情形也至李昭慶一軍臣檄令赴豫剿賊已至周家口因賊蹤盤旋無定追逐於鄆陵洧川等縣迨追至尉氏則聞賊已竄撲汴梁迨行至朱仙鎮則聞賊已直犯山東於是由通許杞縣東行二十九日馳抵曹縣雖不如賊匪之迅速而日行約六七十里步卒已極疲乏軍糧亦將罄竭頃據稟報初二日抵鉅野之章逢集少事休息卽會合潘鼎新一軍分道進剿或可一收夾擊之效又據擒賊供稱桂逆錫楨此次同來欲渡運河前赴曲阜報仇等語臣檄調徐州楊鼎勳之軍來東如聞賊已渡運卽逕赴曲阜護衛

孔林賊未渡運卽暫駐兗州聽候調遣此李昭慶一軍及添調徐軍來東之情形也任賴等逆一股自劉銘傳攻克黃陂後竄出鄂境悉由光息正陽一帶竄至項城沈邱十八日逼近槐店張樹珊冒雨出隊該逆驟聞官軍之至卽折而南趨一日夜竄至江口集距槐店已二百餘里劉銘傳緊躡賊後二十四日可抵太和周盛波聞該逆有回踞蒙亳老巢之信亦於二十五日由歸德馳赴亳州會合銘軍專力辦此一股疊據生擒賊供任賴等逆窺伺山東完善之區銳志東趨目下南未渡淮北未渡潁尙在兩河之間或不至遽犯齊境此又鄂賊回竄皖豫交界之情形也臣上年屢次覆奏調宜於四鎮之外另籌數支游擊

之師始可與此賊縱橫追逐經營半載甫成劉銘傳李昭慶兩  
支擊以應敵今捻逆西逼楚疆東趨海岱相去動三千里馬步  
以數萬計官兵步多騎少每每失之遲鈍必須鮑超劉秉璋劉  
松山等多成數支游兵庶足以布遠勢而圖近功臣現駐濟甯  
應卽在此就近調度俟東事大定再行奏明赴豫所有陳報近  
日軍情緣由恭摺由驛五百里馳奏伏乞

皇太后

皇上聖鑒訓示謹

奏